



記言別集五十六

丘墓

~ 16
2346
16



和
2346
21-16

記言別集卷之十六

丘墓文

蘇齋先生神道碑銘

原任領議政蘇齋盧先生諱守慎字寡悔盧氏
三韓大姓本於光山高麗監門衛大護軍恕生
致仕左右衛大護軍亶亶生監察持平俊卿俊
卿生嵩入本朝為右議政右議政二世有知司
諫院事尚禮知司諫院事二世有同知中樞德
基在 惠莊王時有出處大節事在金文簡公
所撰誌石文於先生為五世祖曾祖敦守府參



記言別集卷之十六

奉 贈吏曹判書敬長祖豐儲倉守 贈議政
府左贊成珣父活人署別提 贈議政府領議
政鴻皆以先生貴故推 恩三世者也母貞敬
夫人李氏籍星州禮曹叅判自華之女也先生
聰明博學為文章尤深於經術未成童既以文
學名十七灘叟李先生延慶妻以女仍師事之
二十選博士弟子學中士多敬之者慕齋金文
敬公知館事以時習箴試諸生歎人才不競見
先生作復歎曰言不可不慎二十七以禮初見
晦齋李文元公請聞存心之術文元公指掌曰

有物於此握則破不握則亡先生喜曰此忘助
之異名也嘉靖二十二年擢甲科第一名初授
成均典籍移弘文修撰明年遷侍講司書有書
筵講義與退陶李文純公同選書堂以道學相
推許為重其年 恭僖王薨 榮靖王立明年
乙巳為諫院正言論劾李苞傾邪小人移吏曹
佐郎 榮靖王立八閱月而薨 恭憲王立有
尹任事士禍起先生收職歸忠州三年鄭彥
慤上壁書加罪乙巳人先生初配順天其年遷
珍島作沃州二千言先生在珍島十九年海中

固質質先生教以禮俗始知嫁娶有禮著人心
道心辨執中說夙興夜寐箴解李文純公見之
曰斯道不亡於東方有往復書 恭憲王立二
十年始解乙巳人先生量移槐山及 昭敬
王立李忠正公白 上遂有收叙之事先生拜
弘文校理明年陞拜直提學兼藝文應教尋陞
副提學乞歸養 上用大臣言特拜清州牧使
尋改湖西道觀察使先生上治本數千言仍進
夙興夜寐箴解 上下校書令刊行時議政公
歿而奔喪幾不勝喪事聞 上特遣醫問之先

生上疏謝進君德之戒六事一務討訓解不務
求實義二務察瑕類不務立治道三務攬權柄
不務合人心四務循前例不務行古義五務悅
諂諛不務愛正直六務喜才藝不務重器識時
有與李文純公講喪祭禮書既三年拜大司諫
辭不許特拜大司憲又固辭不許以母病請告
上曰卿一日不可不在左右以老母來京仍令
縣道共行事及入京上疏言民事 上為之勞
慰且曰任賢才擇守令先致富庶然後庶復
祖宗之治壬申拜吏曹叅判仍陞拜判書時

顯皇帝即位頒登極詔使來先生為上賓辭改館伴仍拜大提學上祥冠儀明年癸酉拜右議政上之元年以校理召還一年三遷為大司諫以憂去復入才三年致位三公專用無此四方想望夏上命三公同天官薦有學行者趙穆李之菡金千鎰崔永慶又薦士四人柳夢鶴竒大鼎洪可臣柳夢井皆授六品爵有災異因辭疾乞免甚力上許之政院玉堂皆以為國之元老不可去也大臣亦白上遂復相請撤淨業院申嚴贓汙法乙亥仁順太妃薨先生

與左相朴淳上白帽帶終三年議上從之時黨議大起先生白上沈義謙金孝元兩貶補外郭越上疏言事有外人通宮禁伐士林之言上怒先生曰此言相傳臣亦聞之越輕信塗聽越雖過矣不可以言罪言者也丁丑仁聖大妃大漸下教大臣留任灌仁淑復官事也上問之曰事何如對曰臣乙巳罪人言不言皆罪也復四人官爵以慰太妃可也政府仍請削其勲釋連坐還籍沒戊寅正月白缸貫日乞免不許時大夫人八十餘上賜米豆三十碩酒

脩魚腊食物先生上箋謝仍乞辭不已拜判中
樞尋復相大臣白上也諫官姜緒進驕溢之
戒言甚切直左右肅然畏憚之不敢言先生曰
緒之言人之所難言者而能言之上無厭聞
之色古人曰君仁則臣直上容諫如此宜有
臣如此也上悅校理金宇頤言成運贈爵事
先生曰曹植成運李恒先王召此三人植高
運謙皆自守之士恒平實開牖後學多有功於
學者今行褒典當先恒而後運也時植已贈
大司諫矣冬上不豫先生召入卧内諸大臣

從之上執手言曰善輔嗣子先生對曰臣當
死生以之上既疾止引見三公令薦士先生
薦閔純亨已春因灾異乞免益力上不許鄭
澈撰地答文頗有譏侮語上覺之然無改作
之事矣先生仍力辭不已上曰天以卿授寡
人不可去也其九月貞敬夫人卒上特加禮
以賜吊賻曰母過毀缺四方之望念日寒途遠
解貂裘并賜藥物令母守塚返哭令列邑共喪
事未葬上聞先生居初喪之節禮諭甚切既
葬又有返哭之命既返哭先生居倚廬寢苦

枕草食蔬先生已六十七 上憂之勉以權
制不已賜米豆至冬又賜之先生上疏謝曰自
惟仕而受祿以為養喪而受賜以為祭臣母生
死皆食臣無功之食云及祥乞歸祔家廟時左
相缺方朋黨相攻擊朝廷大壞矣 上虛位以
待服闋遂拜左議政上疏乞免不許特遣承旨
宣召又遣史官問於中道又宣醞漢江上寵禮
之殊甚乙酉以老乞免不許賜几杖陞拜領議
政既謝命白 上朴謹元宋應溉許筠皆放歸
田里謹元已死矣三人者癸未以名論得罪謂

之三窟鼠者也丙戌四月白虹貫日上疏乞免不
許冬扁十青亭作自銘丁亥又以老上疏乞免
上乃許之大臣白 上曰方中外多虞非某之
德望無以鎮靜不可去也遂寢其命至明年夏
又力辭許之而尋復特命還授 教曰遣史官
某老不行禮令本府郎舍宣諭猶力辭不已移
判中樞己丑春乞奉朝賀不許又乞致仕不許
日本倭遣使求和事下大臣議先生曰天下之
惡一也秀吉弒其君義無可交也冬有鄭汝立
上變事獄事大起先生嘗有命薦金宇顥等汝

立方有名譽亦在薦中 上曰某尊禮之甚厚
而引用罪人國之危亡係焉義甚嚴先生即出
國門之外以負罪自居 上聽大臣言罷判中
樞於是澈為左相實主獄獄事滋蔓搢紳大陷
人心懼之客欲投例自列先生曰既誤薦法之
所不貸豈自明而得伸哉明年四月七日先生
卒先生生於正德十年卒於萬曆十八年壽
七十六歸葬化寧葬用自銘貞敬夫人廣陵李
氏與先生同年生先生卒之年三月十二日卒
祔葬同原無子以從子大海為後官榮川郡守

側室子三人戒來戒難戒後壻一人坡州牧使
許澂大海生醴泉郡守道亨道亨生三男生貞
碩命安遷都護府使峻命奉化縣監景命壻四
人應教沈大孚進士柳德耆都事李沆進士李
弘奭先生之學薦於彝倫日用之則達之天德
天道推之萬事萬物自事父母處昆弟與朋友
交以至事君教俗其序本諸身始諸家推諸邦
國格君心正大義舉賢才遵舊章明治體可見
於講義懼塞養正皆典學之文也先生既拘囚
海島幽愁窮抑涵蓄才學卒以成大用者天也

文章甚高龍洲趙學士綱曰其聲律古氣可比於殷卣周彝先生讀古聖人賢人書沉浸醲郁積而洩之為文章故易奇而法詩正而葩春秋謹嚴乃先生尺木繩準也或疑先生之文不類宋儒王鳳洲之言曰談理之文亦有品別茂叔之簡俊二程之明當子厚之沉深其衛道一也其有韻之文海鳥十九年澤畔吟也正與屈左徒牢愁幽思之同致張谿谷有言蘇之氣格雄拔崔簡易車滄洲極言本朝三百年操觚之士無一人及之者云噫奚待後世之子雲哉先生

別號曰蘇齋或曰伊齋或曰暗室最後左相鄭公琢侍 上從容言曰以某之賢 上倚任之甚重一朝以謬薦坐斥人心惜之 上不聽光海二年廷議以先生請配享 昭敬廟庭光海以為不保終始報罷先生既卒沃州人為之立祠以祀之尚州道南忠州溪上祠皆合享焉其銘曰
道德博文仁也為國以禮敬也盡言無隱忠也守經直義正也

旅軒張先生神道碑銘

先生諱顯光字德晦別號旅軒姓張氏高麗上
將軍金用始籍玉山十二世有府尹安世府尹
生左尹仲陽左尹生掌令脩以直道聞於先生
為六世祖曾祖 贈左承旨俊祖 贈吏曹參
判繼曾父 贈吏曹判書烈母 贈貞夫人京
山李氏 齊陵叅奉彭錫之女也皇明 肅皇
帝嘉靖三十三年正月癸亥先生生八年先
府君歿十七八學既通沉潛經術作宇宙要括
十圖二十三以才學被薦矣許公潛出牧星州
見寒岡鄭先生問南中好學之士鄭先生曰孔

子之門好學者顏子一人此豈易言哉有張顯
光者求學志道宅日為我師者此人也二十八
母夫人沒有喪制手錄柳文忠公嘗累薦於
上及相見遣子衫就學焉萬曆二十二年春除
禮賓叅奉秋又除 齊陵叅奉皆不出明年特
叙為報恩縣監門人鄭四震請問出處之義先
生曰學而優則仕有禮意則仕家貧親老則仕
不仕有二恥欲潔其身亂大倫一恥也欲假其
名索其價二恥也既之縣與父老約月朔月半
之會令各言民瘼闕失補益糾正敦孝弟勵廉

恥尊德行黜敗俗皆移風善俗之大法也二年
不樂謝歸以擅棄官守以法就理有 經筵官
白 上乃得釋夏遊永陽立岳泉石二十九年
上命校正經書先生被召命縣道給馬又連被
召皆不就冬除工曹佐郎參周易校正移刑曹
佐郎謝歸三十一年除龍潭縣令不就又除義
城縣令數月邑有變自劾歸三十六年光海新
立除陝川郡守三十八年除司憲持平皆不就
四十三年修冠儀四十八年鄭先生卒先生與
諸弟子講喪禮秋 顯皇帝崩先生巷哭曰東

民自壬癸之亂父父子子得至今日皆帝力天
啓三年 仁祖克大亂首訪遺逸先生以持平
召之辭以老特拜成均司業國朝初無此職
上即位特為設士設者也又改持平中道以疾
辭明年春陞拜掌令時李适作亂 上南狩及
适敗死 車駕還都先生不及 行在所追至
都下又有除命 上即引見問為政先生對曰
此在 殿下 殿下一心振作日新 上稱善特厚賜
之旋拜執義先生上疏辭之仍言恭儉節用敦
德省刑既出謝 上又引見言人心世道之難

合先生曰自古無不可變之人心亦無不可回
之世道此在聖君賢相相與有為而已也 上
曰中外人心多怨為之奈何先生對曰四方已
困於前時殘暴之政愁痛未蘇都下新經大亂
騷屑未定互生疑貳 上下惻怛之教以脈勤
恤之意則人心定矣侍列者有以反側者為言
先生曰令愚民潛消默化於大度之中則反側
者自安都城四方之本都民定則四方定矣
上為之尊賜之加厚特拜工曹參議 上曰勿
辭小官當大用之後日特命入侍晝講講罷世

子請見以賓禮待之既退上疏告歸即出門
上連有命追之而先生已發命圻省給馬護送
此後連拜吏曹參議同副承旨皆不就六年拜
刑曹參判時有啓運之喪而適有召命既入謝
上疏辭職移大司憲連上疏力辭三告乃許既
卒天臨行上疏言建極之本又曰志卑則道卑
道卑則事業卑事業卑則人不服人不服則隣
國不畏天地鬼神亦不佑矣明日 上引見又
進天德王道累百言辭出 上送之曰見世子
有所教誨也先生告世子曰世子年至古人志

學之年為學以立志為先云明年有虜寇有嶺南號召之命寇退上疏陳政弊仍進私利偏邪之戒八年拜吏曹叅判不就上疏曰殿下不
忘危不忘亂不忘亡然後可以盡君道廷臣能忘其身能忘其家能忘其私然後可以盡臣道
上曰以卿宿德大老每欲同朝而不可得豈寡昧誠薄之致也欲以卿為上下矜式教訓世子
不致責之以職事十年又拜大司憲不就時李貴崔鳴吉等言章廟追尊之議先生上疏言
追尊之非禮曰以孫繼祖繼絕之常道云十二

年又拜大司憲不就其五月有仁穆大妃之喪上疏言亮陰之中充養至德建立大本以為
祈天永命之本明年七月仁政殿震先生上上震下震十六卦陳修省之戒十四年特加資憲
尋拜工曹判書又辭疾時以章廟祔廟之禮
爭論者皆得罪先生上疏曰殿下於所生所
以致孝者既盡矣而人且疑其過於禮也况入
廟在古無可據之禮此欲孝而傷孝欲仁而害
仁也上不聽又明年拜右叅贊不就十六年
拜知中樞有召命禮意甚至先生至中路上

言別集卷之十六
疏辭疾 上賜之藥物先生又上疏謝仍言朝
廷不和之弊累百言有曰宇宙間一道理而已
善惡各一類邪正各一類是非各一類善惡邪
正是非未聞並立並作並行而此道此理不悖
者也 殿下之所建極者未盡而羣下不得會
其歸也其十二月有南漢之變先生以為行朝
阻隔命令不行通諭州郡父老各舉兵勤王又
出力以助餉十七年二月聞南漢解圍先生辭
先人之墓入立岳山居立岳在東海上改名立
岳曰立卓岳蓋寓意也七月命門人製深衣九

月壬申先生歿于晚勛齋年八十四前夕大雷
雨山崩川水溢訃聞 上為之罷朝巷市二日
使本道庇喪事乙未發引返故山從柩之士五
百餘人 上特賜祭十二月癸酉葬于金烏山
下吳山之洞東向之原前夫人鄭氏贈祭資适
之女早卒有女一人婚祭奉料晉慶後夫人宋
氏忠順衛淨之女先先生八年卒無男取從弟
顯道之子應一為後為大司成晉慶生五男愔
悝悝愷愷悝悝縣監又三女婚任景尹李規曹夏
英規教官應一生二男錄鍵鉦錄別坐鍵持平

先生歿臨臯川谷金烏皆推祀之不知出立
元堂皆有祠 孝宗六年經筵官吳竣白上追
爵左贊成後三年經筵官吳挺緯又白上加贈
領議政命太常賜謚曰文康道德博聞曰文淵
源流通曰康先生沉潛渾厚之積崇深博大以
韜晦自隱為貴既學廣而德備近而心術人倫
之則遠而萬事萬物之宜推至於上天無聲無
臭之極無所不究和而成德仁以利物利物莫
先於惇獨故曰矜鰥寡恤孤獨天地之大德吾
心之全體也又曰天地間事無非人事之所當

為者其戒曰虛為萬實之府靜為萬化之基貞
為萬事之幹謙為萬益之柄儉為萬福之厚
仁祖時先生召至京師相國李文忠公見先生
問時政先務先生無他答但曰有一言今者國
之大患在疑相國退而語人曰賢乎可謂善於
相時者也時功臣等暴得大權心畏惡所忌者
皆殺之士大夫重足仄目人心大壞先生引對
進言多此意也先生所著述甚多而雖家人子
弟亦莫之知也如易學圖說圖書發輝易卦摠
說經緯說晚學要會宇宙說先生歿後乃出又

有宇宙要括錄疑俟質耄戒文集諸書其銘曰
博達之學利物之仁深厚之德遠而通和而敦
儼而翼嗚呼可以權可以動可以式

戶曹判書金公神道碑銘

公諱世濂字道源姓金氏其先本一善人三世
祖公過永柔縣令祖孝元事 宣祖重於時貳
於當路者斥出為永興都護府使卒父克鍵通
川郡守母陽川誼氏弘文館典翰翁之女也後
公既貴推 恩府使府君為吏曹參判郡守府
君為吏曹判書許氏為貞夫人 皇明萬曆二

十一年十二月一日公生我 宣祖二十六年
也自為兒時端重有儀才藝卓越名譽早著二
十許夫人歿既三年選國子兩試其明年擢甲
科第一人為禮曹佐郎兼侍講院司書俄入王
堂為修撰知製 教丁巳為司諫院正言嘗光
海九年有廢 母后之議起公斥劾其主張者
得罪竄郭山一年遷之江陵又一年釋之許任
便居住者五年 仁祖既反正以修撰召之尋
改獻納復入王堂至校理甲子以繡衣廉察湖
西以父憂去既除喪為校理移司憲府持平皆

不就後復以校理遷獻納 賜暇書堂丁卯之
亂 上出幸江都 命體相李公元翼從 王
世子至全州公以從事在軍中聞祖母鄭夫人
歿而奔喪體府許以所乘馬遣之後當路者以
為奔喪不得乘傳不許銓薦領議政金公瑩知
經筵鄭公經世白 上上怒以為排抑異已其
沮毀者皆黜之後復以修撰召之公上疏自言
犯律 上曰此陳三之也 召之不已不得
已入謝猶力辭仍稱疾還鄉里凡三召以副校
理入謝累遷政府舍人復以繡衣出湖南 啓

陳民情政弊 上府蠲逋租以寬民還為副應
教時功臣等爭言 章廟追崇事諸言不可者
皆斥去公與諸學士上劄力爭俄改執義辭曰
天威日嚴大小戰戰莫不寒心自古安有否隔
如此而國不亡者也斥臣鴛劣云云 上乃止
三司竄逐之 命時朝廷以虜為憂方議等城
江都分遣御史兩湖嶺南諸道試諸生令不才
者從軍又有棄清北之議公上疏曰國家失百
姓心在此歷數言之又曰人心離而大勢已傾
殺下雖有十丈之城百萬之衆無益於勝敗之

數羣臣為此計者過也 上下其議廷議多右
之者以故其事不行有功臣李貴自薦為吏曹
判書公啓 上曰臣聞客有求一官於貴者貴
心薄之欲啓其人自銜之恥貴亦恥之安有堂
堂盛朝以貴之所不為者待貴也 上為安李
貴斥公為玄風縣監至縣立學規修鄉約法條
制詳密逾年邑大治有宰相白 上上賢之令
上其條制頒行四方乙亥有上變者連累及公
上即釋之其年以疾去歸邑人至刻石不忘其
遺愛云丙子馬島副官平調興與其主不相能

日讒愬於其國仍搆纂我者百端關白要我遣
使以試彙朝廷以公為副使如日本海路五千
里至其國都關白大悅禮之上堂治道葺館供
帳甚肅令其貴臣調官制服色事仍與語詩書
仁義之說頓首謝曰海外之人乃今得聞君子
之言其贈遺皆不受關白以候館供帳之餘具
黃金百七十錠辭曰饋贖受之至金絕河投之
淺水曰示我無貨取而已毋令有用者無用後
馬島收其金乞代歲給布一萬五千使還 上
新從南漢歸矣公以司諫特進通政出為西海

道觀察使明年入為同副承旨移兵曹參知兵
刑二曹參議己卯再為吏曹參議副提學復為
政院辛巳乞養為安邊都護府使一年為本道
觀察使北俗雜胡羯易怒易叛守人率武人多
不法民怨之公乃申明大同法令科輸毋濫而
北邊逋欠積久流亡尤多收郡縣粟不入會計
者又出營儲萬一千六百以償之其餘驛聞悉
除之增損鄉約頒行郡縣聚士府學親勸學藝
選於列邑得優於學者以教郡縣士練戎卒治
器械以為緩急之恃甲申移關西觀察使西方

多事民不堪命請於朝得三千金五千斛穀以
寬民北使繼至其傲暴我多無狀公待之無所
失亦不以賂遺驕其心彼亦畏憚之不得恣所
欲平壤置養蒙齋以大亂初定尤以養士為先
乙酉入為大司憲兼弘文館提學尋改都承旨
上甚倚任之擢為戶曹判書於是大禁郡縣防
納公素多病廉察兩界勞悴四年前年長子翊
相死疾仍劇卒丙戌正月十七日年五十四其
四月葬于揚州南族葬之次後二十年改葬州
北姑母峴西南之壠公好凝重動止有法臨事

詳慎無疾言遽色明於體要事簡而民易從朝
野重之其在 經筵啓發聰明敷陳義理委曲
的當相國鑒稱之曰真學士也鄭公經世亦曰
論人物為當代第一云晚年尤致力於經學自
修身謹行推至於教民正俗又本之心術之要
考之行事而可見禮所謂夙夜儆戒秉德不回
者也樂觀書文章典雅尤長於詩嘗斥居東海
上自號東溟有東溟集六卷前夫人文化柳氏
歿而無子後夫人柳氏亦籍文化 贈兵曹參
判成民之女生三男二女男翊相弼相儁相堉

二人李嘉雨申曷皆名家子其銘曰

溫恭慎德以篤愷悌觀其行也直道不回通塞
不貳觀其定也周聞令善犯而不隱觀其敬也
秉禮制義遠人向服觀其使也寬力教衆民樂
慈惠觀其理也

貞夫人柳氏籍文化高麗大丞車達之後也至
本朝有議政寬議政四世有昌平縣令漳縣令
生 贈兵曹參判成民於夫人為皇考妣貞夫
人李氏延原府院君光庭之女也夫人端厚慈
仁婉而重人不見喜怒事舅姑盡承順奉祭祀

極潔誠躬行節儉不事奢華教家正家皆有法
度動合禮義通文詞亦不以文字示人仁及宗
族一門歸心至於財用之節必量入以為出常
有贏餘公為朝重臣三任方面貴至九卿夫人
戒飭愈謹無一以貨賄累公者外祖延原家法
甚正夫人之賢能服膺不怠恒言必稱外家家
訓公既卒夫人教養二孤訓戒必嚴言語必慎
容止必端自孩提有識習以義方亦必擇師而
就學以至成立皆夫人之教也其教曰汝之先
君臨下必嚴與賓客必有禮對客未嘗戲謔喧

譁歷舉所親善者皆一時名流曰汝亦擇人而
交必如汝先君之友善及儁相以前任弘文修
撰出安岳夫人七十九臨行戒之曰居官庶謹
為第一務一事不謹人之慢忽柔之甚可懼也
務凝重戒輕躁禁奴僕嚴內外律已不謹刑罰
不足以畏人也又申之以興學教士其明年夫
人卒臨卒亦不以死生動心曰此命也命侍者
治初喪之禮移正寢而卒夫人生於我 宣祖
三十五年八月六日卒於今 上七年五月二
十三日後公三十六年為八十其八月祔葬善

乎可謂女中君子而高年考終無非天道之報也

忘憂堂郭公神道碑銘

公諱再祐字季綏姓郭氏玄風人成均司成之
潘之孫黃海道觀察使越之子母晉陽姜氏嘉
靖三十一年八月廿一日公生器識過人好讀
書二十七從先大夫如京師有相者見之曰當
作巨人名聞天下三十四擢庭試第二名以所
言忤上意命盡罷一榜及第明年先大夫歿
既卒喪因廢舉子業釣於江上壬辰之亂賊連

陷諸城長驅旬月犯圻甸上西幸公傾財募
壯士起兵於宜寧先據新繁粟守要害連戰連
克亦不以斬馘為功以初起兵兵少賊強設為
竒兵得勇士數人與公皆絳衣白馬誘賊追我
匿入林麓人各出沒山上閃忽疑惑詭謂曰天
降絳衣將軍伏兵亂射賊大驚亦謂飛將軍不
敢近公所領兵皆鄉兵烏合不習於兵又怯於
攻戰公每戰必身先士卒以激衆心以故衆皆
出死力十戰十克遠近響應時以巡察軍常退
守多不快於公及與兩湖諸將勤王兵潰奔還

召兵諸郡縣擾亂人心益不快義兵思欲散去
公發憤罵曰睚可斬因數其八罪欲移兵先擊
之巡察嚴兵自守一以叛聞一移招諭衙門欲
捕囚以聞金公誠一謝曰某果有叛謀彼方據
兵非一力士可捕若無叛心一書足以開悟乃
移書責之曉以逆順義兵將金沔亦譬曉之甚
力公復書謝曰公 上之所遣公之言乃 上
之言敢不從衙門即 啓上某為國無它意因
陳戰捷狀 上不問下教褒其義兩軍之難解
公雪涕勵兵日擊賊兵勢益張於是玄靈昌屯

賊悉燒倉粟而遁江右農桑晏然 上下諭嶺
南士民恨聞名之晚也初賞爵幽谷道察訪後
改刑曹正郎尋陞折衝將軍連為星晉二州牧
無助防將陞防禦使諸義兵皆屬焉時賊屯兵
海上體相李公元翼令治嶽堅築石門欲悉衆
一戰請楊元兵以為聲勢公曰今日之勢不如
修城池務積儲待彼而動猛虎在山則威在野
則怯天兵在湖路猛虎在山之勢也秋賊大至
築石門未完移守火旺令諸將士曰慎毋與戰
堅守而已賊不得戰相守一日一夜乃渡江西

屠黃石進陷南原於是列城皆潰體相念兵少
守城危令下兵公不從城守益堅尋以母憂去
上累召起復終不起明年賊首秀吉死而諸賊
兵撤歸公避地東界之蔚珍守喪三年父子作
業以販賣既除喪 召為察理使按南邊仍為
節度使啓請脩島山城具陳城守形便朝廷不
從公上䟽言時事即棄歸大司憲洪汝諄論以
潰慢付慶靈巖一年 上釋之公遂入琵琶山
中辟穀導引學神仙之術 上復召為察理使
尋天生城仍為善山都護府使不赴拜安東大

都護府使又不赴冬陞嘉善大夫行龍驤衛上
護軍後復以察理使改同中樞遷右尹皆辭不
至光海元年復為嶺南左節度使明年為水軍
統制使皆不起連有 召命夏至京師以副摠
管遷左尹尋拜咸鏡道觀察使時李相國謝病
杜門公直入見相國曰將相和調則內外一體
今相國杜門吾且去矣三上䟽遂去歸光海宣
諭者再而終不至四年為湖南節度使不起其
年光海殺永昌公上䟽言不可殺不報後五年
公卒萬曆四十五年四月十日年六十六光海

賜賻吊祭如儀命立傳其八月某日葬于玄風
縣南仇知山郭氏族葬明年鄉人為之立祠貞
夫人商山金氏曹南真先生外孫也生二男二
女男澄活督辛膺成以道澄生汝魯汝揖活生
汝植汝梓汝樞汝松辛膺生東望時望成以道
生萬江萬河公又有側室子二人灘沐公平生
非信不踐非義不為身當大亂率勵義士誓心
伐賊忠義著於四方既事平又不以功名自居
遺世遠引以盛名患害不及焉公棲息之所驚
山倉岩有忘憂亭銘曰

處名難居成功尤難知微知幾哲人高蹈確而
安

右叅贊清川君韓公神道碑銘

公諱準字公則別號南崗姓韓氏本上黨人上
黨之韓出自箕子箕子氏世衰為馬韓子孫居
上黨稱韓氏高祖清平君堰曾祖 贈承政院
左承旨弘弔祖 贈吏曹叅判鎮父敦寧府正
贈議政府領議政琅城府院君守慶母貞敬夫
人柳氏籍晉州掌隸院司議祖誼之女也 世
宗皇帝嘉靖二十一年壬寅十二月一日公生

其末年我 恭憲王二十一年丙寅登第補成
均學諭庚午入翰苑壬申陞待教癸酉以奉教
轉刑曹佐郎甲戌改兵曹佐郎乙亥移禮曹復
為兵曹 仁聖太后之喪奉 教書銘旌及立
主又書之陞刑曹正郎丁丑改兵曹遷司憲府
持平累轉復為持平尋陞掌令以疾遞授宗簿
寺僉正有巡撫湖南之 命還拜司諫院正言
已卯以成均司藝陞司成錄玉堂明年加通政
出為穩城都護府使政清得吏民心諸藩胡皆
悅服一年以承旨 召還父老皆涕泣而藩胡

諸酋長退出境皆羅拜曰厚德無以報其年又
出為義州躬節儉修廢政務蓄積府庫充溢至
累巨萬時有領詔使者來遠迎使李珥見而多
之以實白 上上嘉之 賜表裡以賞之及恭
以治理仍任者一年甲申入為戶曹叅議以不
悅於當路者連備擬晉州順天湖西南二省
上以為久勞於外復入政院乙酉以都承旨改
判決事後連按兩湖湖南時特加嘉善戊子賀
聖節既使還出按海西西邑有鄭汝立上變事
公特加資憲以知中樞仍任之尋遷右叅贊

賜推忠奮義協策平難功臣號封清川君時有二子同榜進士設聞喜宴上在慶會樓望見燈燭光問之即令中貴人宣醞寵待之如此有王子專山澤之利居民失業者多怨公極言其不可三啓上乃許左相柳成龍欲薦為銓曹為首相所沮壬辰有倭寇國家昇平二百年卒有亂州郡瓦解尚忠二州連敗陷沒公白上大徵四方兵勤王於是上西幸冊光海君瑋為世子監國分遣諸王子順和君珪出關東公受命從之至永平上命追至行在所至

平壤加正憲賊既薄平壤上幸寧邊世子出江東公以賓客從世子下令之從上而急政院不及傳至陽德乃始聞有命追至義州上謁請罪上還遣世子所癸巳寇退公為漢城府判尹上特遣公奏收復平壤賀平寧夏仍請善後事帝許留劉綎兵五千竣事勅我王世子同戶兵曹前往全慶總理軍事公以戶曹判書乃行甲午既復命以父母年老避亂江西乞行見上令其長男汝淑為龍岡以便養乙未又遣公奉表謝仍請冊封世子帝不許

公在道疾甚 上遣太醫問之既復命疾益沉
又復仕者六年庚子春先府君歿明年十月某
日公卒春秋六十太夫人八十二訃聞 上為
之罷朝巷市二日其年某月以禮葬仁川之桂
谷從先兆之次公長大有威儀重厚寡言一時
稱長德巨人性不喜交遊斂避聲勢好儉約勤
已任職夷險不賣鶴峯金誠一擬之山嶽云貞
敬夫人崔氏完山君宰之後而中樞府都事貞
秀之女也先公六年某月某日卒而葬於同原
生八男二女男僉知中樞汝淑倉守汝澂刑曹

佐郎汝沃戶曹正郎汝滄市令汝澂禮曹判書
汝澂副司果汝濟鎮岑縣監汝洞壻二人僉知
中樞尹起聘儀賓府都事金仁龍側室二男僉
節制使汝泌武舉人汝泓又三女崔承緒金得
賢妻縣監沈挺世妾其姊妹之次為人妾者為
中女僉知無子以從子楸為後楸縣監生三男
三女男五相五弼皆早歿五相 贈注書少男
泰相出繼壻辛晄洪萬始宗室清平君詮五相
生均亦早歿無子以堂姪子埏為後倉守有庶
出子拱拱生五岳五明五明武科佐郎二男二

女男休保休府使壻李惟聖承旨黃淮祭奉休
生舜相生負有三女壻李奎生負李夏命進士
尹挺麟保無子所後子泰相也舜相生戴正郎
三男一女男稅擦檻稅司議擦武科壻金靖縣
監有庶出子格出繼稅二男三女男五徽夔相
命相壻承旨鄭繼胄宗室綾平守信權大均五
徽無子夔相出繼擦生塗墜陞塗生負命相生
增壻堪檻生五胡早歿無子壻崔基峻南翊翊
進士市令一男二女男彬壻崔道源沈之演之
憲縣監彬四子五福五章五喜五王五福二子

量重判書一男二女男摠壻沈靖尹堦堦司評
庶出子樸武科折衝摠生五奎五奎生塾生負
尹堦生世章郡守司果無子有一女壻蔡鄭後
進士縣監三男三女男楸為伯父後相摠摠進
士壻鄭成燁宗室嶺陽君僕相五子定相進
士應相有相得相任相壻李經摠三壻尹以弼
梁昇鄭璿昇生負定相生玷墳應相生延為五
相後金都事三男一女男震海起海濟海壻尹
壇僉知震海子益昌文科縣監尹僉知二男一
女男浣淳淳宣傳官壻柳琳統制使僉使繼後

子格格三子致相就相義相汝泓一男一女男
標壻柳培崔承緒一男四女男趙壻鄭基泰文
科尹漢宗室忠陵令吉元柳以華金得賢二子
昌壽重壽沈挺世安無子銘曰
魁才長德邦國之傑許身駘馳匪躬之節勒銘
彝鼎良臣之烈

贈左叅贊羅公神道碑銘

公諱緯素字季彬姓羅氏羅州人羅氏自高
麗上將軍富至工曹典書璉最貴大男公彥
克倭有功官至典農正四世有典洵直長逸

孫其後有司憲監察 贈左通禮旌尼山縣監 贈
左贊成士忱以善行聞 中宗世旌孝子之間於
公為王父父諱德峻受學於鄭介清先生以才
學發聞己丑禍佐左相澈為禍首先生既窮死
漠北以門徒弟子并流石幕之北南北二千里
事解除司圍別檢斗巖金相國薦其賢擢拜報
恩縣監歿追爵戶曹叅判母長水黃氏治平相
翼成公喜之六世孫而 贈判決事顯之女也
萬曆十年公生生十二母歿後十一年父歿又
未沒喪而繼母歿公既孤苦力學光海八年補

國子生負後五年試士三南公以壯元直赴及
第仁祖元年再試光海末科公以丙科由秘書
書陞秋官佐郎出為玉果縣監五年黑漢陷我
兩西兵食急相國李文忠公為體察使召公問
計仍令募粟甚多當議賞公辭曰資人之粟邀
已之功無義也相國多之秩滿以考工佐郎陞
地官正郎無記注官八年以直講轉司藝尋出
為林川郡守十二年以春官正郎移太常僉正
後連為尚衣司導正十四年為豐基郡守十九
年為原州牧使二十三年復為司藝尋陞判

兼編修官改太常正後四年陞通政為密陽都
護府使明年謝歸又明年為慶州牧使三年公
已七十歎曰年已老矣官亦休矣遂決歸等水
錦湖上曰宙雲亭在先壠之下有架松脩竹長
江沙渚瀟灑其外郊原徃徃有古木墟烟上下
百里公日遊處自娛初澈敗南人為鄭氏立祠
以祀之時澈黨復用事白上毀其祠公既介
落於世咄咄曰生此世甚漸公例授西樞以大
年至同中樞皆不就八十五卒訃聞上賜帛
賻如儀葬榮山東向之原以長男紳寧國原從

推 恩追爵左叅贊貞夫人李氏籍陽城府使
瀟之女治家教子孫稱女中男子公卒之後年
正月夫人歿年七十六祔葬同原有三男禱戶
曹正郎襁繕工僉正衫義禁府都事又有三女
婿生貧金晚壽士人李萬鍾縣監鄭岐壽禱生
斗三司贍直長斗章 孝陵叅奏斗三有男晚
相婿二人李旼李潞叅奉襁婿三人鄭德祥睦
昌遇權顛昌遇郡守無子以兄子斗章為後衫
生斗春斗夏斗秋斗冬婿四人尹尚績教官李
萬植進士李龍徵高可賓晚壽有二男四女男

歲最萬鍾有二男徵善徵獻岐壽有一男四女
男重元進士內外子孫三世五十餘人公溫恭
敦厚善於宗族交友不喜循俗善柔通籍三十
年不樂於朝為州縣二十餘年以壽考閒暇江
湖八十五年三男皆在仕列襁連為進邑奉
養之備鄉里稱之以為德善之報公既早失父
母終其身不去丘墓每見新物必薦墓或言非
禮之禮公曰寧失於厚得盡於心疾病戒其家
人曰時已七月宜薦稻吾新薦畢矣羅氏為羅
之大族自上將軍子孫不出鄉至今四百年忠

信謹厚稱孝悌之家其 賜祭文曰孝悌之家
恬雅之性鄉人起敬五福俱全云其銘曰
禮死徙無出鄉厚德之方嗚呼可以興可以昌
可以長

吳判書神道碑銘

公諱挺一字斗元姓吳氏高麗世有侍中大陞
同福縣人其居傳說四十八石燈夜則燃燈誦
天其子孫貴大自侍中至參議佹顯者七世又
五世至吏曹參判有齡亦名卿生黃海道觀客
使端於公為皇考母貞敬夫人沈氏籍青松吏

曹判書懿憲公諒之女也公少聰明絕人五歲
始就學六七已續韻語驚人西垞一松二公口
號以觀之稱奇才十三作河清咏雪長句踈庵
任學士稱絕作十八選博士弟子 仁祖十三
年成李氏國學從祀之議始起令館學諸生上
疏言之公出而與上舍生蔡振後等上疏言不
可從祀狀忤時議其首疏者數人削名太學公
仍遂不復入太學也十七年 上幸太學親試
士公擢丙科第一人選槐院壬午以著作薦翰
苑為附時議者史官一人所沮其薦之者上疏

言其狀沮者罷而薦亦寢甲申為吏曹佐郎以
繡衣出北道條上不法廢墜積弊悉罷行之乙
酉為獻納有妖醫李馨益者挾方術治 上疾
公論以不敬 上怒斥為務安縣監明年擢重
試第三人拜太僕正戊子以司諫陞同副承旨
尋陞右副其年出為黃海道觀察使時北使繼
至須索無藝公絕不許一不以恐喝抑約禮節
不愆彼亦畏難之後使者來八境必先問公去
留 孝宗二年辛卯為左副承旨奉 教書
仁烈王冊肅寧殿上徽號題主陞嘉善壬辰以

京畿觀察使移關西省西路大飢又有北使來
而財幣竭以便宜出管餉積儲又移江邊粟民
無捐瘠財用大饒有大臣從西來者以實白
上上嘉之丙申為都承旨有徐休者上變告
上弟麟坪大君潛公亦在告中公之妹為大君
夫人故也有一二樂禍者實陰嗾云 上知其
詐以為出於朋黨相仇 召見公慰諭之其上
變者與知謀者皆被死而公猶恐懼不敢出上
疏自陳 上曰迺不信予言乎勉起之尋以母
病辭適公既不遇於時自此益無進取意丁酉

特拜大司憲時賈人有生事於彼者查問使者
來執法之長必同按此事 上難其人有是命
已亥又按畿省方 大行在殯有因山移作之
事財力已匱而徭民急既伐石治材大役已具
公發舟車衆力百役畢移功力省而民不病臨
事善謀周慎詳密能使人安於趨令無一犯科
失期者答筭不用民德之畿輔有惠澤碑庚子
復出為開京開京風俗逐利慳吝好訴爭相
訟公一治之以法設大禁以防之址使來者皆
以大都貨物殷富徵索倍之公不聽一如西路

事例以為令式間井晏如公去而百姓立去思
碑萬曆間伯祖判書公為留守崇禎二年先觀
察公為經歷後三十年間公再為留守有吳氏
三世碑乙巳為刑曹判書掌令金益廉造言訛
劾頗無狀大司憲鄭知和不從而引避卜其事
甚悉 上以益廉所為不正命逋其職公亦上
疏力辭不出後再為刑曹皆不出戊申址使來
公為嶺前年國家聽用事者言繕治慈母城約
條所禁而丙子克我南漢既夷其城者也使者
間知之求見城甚急公辭曰其地虛郭固無為

除途修館迎勞有禮今者引入枉道非儉者職也使者迺止庚戌為戶曹判書又辭不出正言洪億受人指欲劾之諸僚不從而億反述職時用事者以 上尊禮以聽之威福人已二十年人人不目畏事之公恥在己而循人一不與相見為禮其容在三司者爭攻擊以媚悅如此其二月祔 神德太廟以題主陞正憲八月辛亥公卒公生於萬曆三十八年九月庚戌春秋六十一訃聞 上為之罷朝巷市二日 命禮官賜祭十一月癸卯葬高陽滿月崗先龍王之東公

敦厚慈惠其事親處昆弟忠愛克順各盡懽心謹祀事睦宗族與朋友交皆可以觀其仁公家世甚盛諸父昆弟諸甥姪繡衣乘軒者十餘人一時榮之而公常以滿盈為戒教家必以仁愛為行有過亦不加訶責使之自改至僕隸下賤亦不以罵詈加之務盡恩信以及鄉黨隣里公秀而雅居處整齊不見惰慢能使人可親而不可狎口不言人之過聞一善則喜之若在己與人無玩娣雖其人不可亦無矯戾之氣樂讀齊魯語孟氏書終身不倦內植益堅未嘗對人談

經善草隸亦不以才藝誇人性好恬靜官位已
盛澹泊如寒士見世道日亂知不可為而不去
曰我世臣義不可去也無事則時與親愛數人
登宅後山石佳處閒暇蕭散以自暢公歷仕三
朝通籍三十餘年歷官承文院正字博士太常
直長成均館典籍直講校書館校理侍講院文
學輔德弘文館副應教太僕正議政府舍人兵
曹吏曹佐郎正郎司憲府持平執義司諫院正
言獻納司諫春秋館丞編修官戊子以後承政
院同副右副左副都承旨掌隸院判決事禮曹

叅議刑曹叅議叅判判書兵曹叅知叅議叅判
吏曹叅判司憲府大司憲司諫院大司諫工曹
叅判判書戶曹判書漢城府右尹左尹判尹中
樞府同中樞至知中樞都摠府至都摠管義禁
府至知義禁 書筵為右副賓客 經筵春秋
館為同知事補外以獻納出務安縣監任方面
黃海平安京畿等道觀察使開京留守或一再
或五六治績尤多三為京兆為政廉平公既卒
都民父老多歎息追思不已公歷駁顯要貴至
上卿不立尺寸為子孫業及卒家無甌石之儲

客皆哭失聲相吊貧交遠屬聞訃來哭有千里
而至者貞夫人丁氏籍羅州觀察使好善之女
生七男始泰始益始昂始謙始震始恒始萬始
泰郡守始益郡守始謙縣監始震奉事始恒備
邊郎始萬持平二女一人適士人鄭宗祥一人
適叅奉姜碩臣又有側室男始有女一人適幼
學金燧銘曰
利澤博於惠善慶篤於仁盈而能謙貴而能貧
世其德以裕其後人
記言別集卷之十六終

記言別集卷之十七

丘墓文

贈左贊成金公神道碑銘

公諱俊龍字秀夫姓金氏本新羅苗裔也高麗
時有吏部尚書巨公賜食邑原州封原城伯子
孫遂為原州人原州之金始此其世多達人顯
者入本朝有元度公暎五世有節度使末孫
與朴節度英齊名為友當時有擢用臺省之議
已卯諸人敗而不果於公為高祖曾祖諱安祐
少有名譽早世不成追贈左贊成祖諱瑛以

言身集卷之七
典設司別坐追 贈吏曹叅判父諱斗南 昭
敬時名人以治行高第貴八十九以大年至同
中樞母貞夫人金海金氏潭陽都護府使諱希
弼之女也公魁偉自為兒戲已不與凡兒等見
者皆期以遠大萬曆三十六年我 昭敬王四
十一年公二十三以武科發身為宣 傳官又
以觀武才壯元陞訓練主簿為法聖水軍萬戶
二十八為馬梁僉節制使以能陞折衝為仁同
都護府使二年改榮川郡守兼助防將及光海
廢而四方無紀 上分遣繡衣察諸郡縣不法

公特以治理 賜表裏其明年遷址道兵馬虞
候冬移會寧都護府使又以多績 賜表裏以
賞之仁同會寧皆有政清碑百姓追思不已天
啓八年我 仁廟六年公四十三為西海節度
使尋遼冬為中和都護府使一年為嶺南節度
使三年以折衝擢拜北道節度使公出入北關
前後十年威名已著軍吏士大悅三年貞夫人
卒公已五十居廬三年哭泣幾滅性既除喪為
畿輔右防禦使仍為湖南節度使其冬虜大舉
攻我入我境三日先驅已薄 國都 上急出

幸南漢大兵繼至南漢受圍虜勢盛強召兵曰
急公即起營下親兵行收郡縣兵勤王遠斥狃
整戎卒師行有律虜遊騎四出亦觀望而已不
敢逼至稷山湖西兵在竹山虜攻之甚急體察
從事朴筵欲先救竹山公言勤王之急不從也
受命十三日至龍仁光教山據險而陣諸勤
王之師皆已敗沒湖南兵獨專薄南漢以為聲
勢出勁兵擊破虜遊騎斬馘甚多虜患之合蒙
古孔耿兵數萬乘曉霧直前欲一擊破之勢若
風雨公杖劍誓衆立矢石之所以示必死士皆

殊死戰虜且進且却終日力鬪虜以輕騎潛踰
後嶺先據上峯矢下如雨公急出勇士數百爭
登曰此正忠臣報國之秋也薄戰士皆一當百
虜有被甲執旗立馬峯上建大旗令衆衆皆合
聚公指之曰彼不殺賊不退督戰益力衆砲俱
發執旗令衆者與諸酋長左右立中凡一時死
者數人而虜衆死者相枕藉不可計數我兵死
者僅數十虜大潰下山處處積屍燒之虜中皆
哭聲夜幾二更矣閱軍中砲丸已盡軍食乏朝
日虜必大至不可當欲移陣休士卒乃列炬為

疑兵潛師夜行至朝虜果大至則空壘亦畏伏不敢追虜敗將死者白羊高羅虜之貴將以善鬪功高先汗以女妻之重於虜者也我兵中路夜驚軍亂大號曰為主將既力戰勝之卒有變徒死無益皆散去公與麾下騎士數百至水原患無兵欲南下更收兵為後計監司李時昉畏胡不赴亂心內慙忌節度之有功反辭以聞從事違既心怒不從已言亦毀於上公當得罪大臣李聖求崔鳴吉極言戰捷狀曰功多實無罪以故時昉竄公得免既事平公常為禦營中

軍家居數年以病不出客來問者皆憂其不起而李公溟素善私謂其子曰某也豈助攻中國者也其疾固也時林慶業柳琳皆被驅從搬島錦州之役矣崇禎十二年我仁廟十八年為金海都護府使一年為嶺南節度使再任也軍中事復修前時約束而已明年疾甚上疏乞解印綬輿疾行十許里客死館次年五十七時有大星隕於南方議政金瑩元斗杓在朝堂聞訃至驚曰天也南方星隕果然失一良將上特令一路送喪有司致賻如儀賜祭文稱其功

業倚如長城云公生於萬曆十四年十二月二十三日卒於崇禎十五年十一月五日其十二月十二日葬陽川縣南山族葬公沉毅多大略謙恭愛士能得人之死力自二千石以至連帥禦軍數十年嚴約束信賞罰繩墨必謹不媚權貴不徇私枉以官為家歸則居無室廬居處服食樸如列士時及歿而歸家貧凡喪事依人以辦人莫不賢之光教之逮萬口多之而公曰當此之時主辱矣將兵之臣不死城下罪也他尚何說哉其心以為不幸遭值傾覆乘輿下城為

人臣滅身不為媿破虜不為多雖受任不辭慨然不以功業自居以守死善道為心此忠臣義也公平生居則孝於事親友於兄弟出則忠於事君與人交而信此先大夫以行誼立名公能守而不失如此蓋其賢有自云夫人林氏籍淳昌軍資監主簿諱繼之女也能多識前言往行一以無過自飭厲門無苞苴女謁皆夫人之賢也公歿十六年而孝宗九年十二月十八日夫人七十六歿後年二月二十七日祔葬南山有四男一女男敬文漢文仁文炫文壻鄭相敬

文司宰監僉正年八丁壽爵僉知中樞府事生
三男春章振遠亨遠有一女壻參奉李益振遠
生夢協亨遠有二女壻申弼卿李益休漢文海
西節度使生碩義禁府都事有二女壻李震晟
尹首孫碩生夢商夢良夢商生負夢良訓鍊院
正有二女壻安石宣嚴縹縹進士仁文司僕寺
判官追爵吏曹判書生德遠刑曹判書生夢陽
司諫院正言有二女壻柳憲章韓宗範憲章進
士炫文兵曹正郎男弘遠壻尹楷皆進士弘遠
生夢瑞有一女壻成任鄭相通德郎生重熙重

胤皆進士有一女壻鄭奎齊李震晟一男尹首
孫二男弘遠又一男一女鄭重熙二男鄭重胤
一男一女皆未長庶出子女六人三子乃文全
文會文三女郡守朴廷翔監司元萬石監牧李
益常妾內外嫡庶子孫至曾玄之世并未長者
百有餘人其銘曰
矯矯虎臣公侯干城忠義之積萬夫之望百代
之名

茂城府院君尹公神道碑銘

公諱洞字而遠姓尹氏別自號曰退村其先本

茂松縣人高麗名臣尹澤之後而我治平相子
雲之五世孫也曾祖監察化頌 贈吏曹判書
祖校尉縉 贈左贊成父別坐彥清 贈領議
政松陵府院君皆以公貴故得推恩三世母全
州李氏別提瑣之女 贈貞敬夫人公少受學
於濯溪全致遠先生名譽早著 昭敬九年擢
進士第一名十九年登大科初授槐院權知副
正字尋補藝文檢閱三年為諫院正言轉禮曹
正郎己丑差行臺賀聖節仍請宗係事 帝許
之而降勅特頒降會典既復命 上重其功賞

奉使者公例陞司膳寺僉正庚寅拜司憲府持
平先是有鄭汝立上變事遂為己丑之禍方策
功公論推官等濫受功爵忤時議當得罪賴成
文簡公渾力言坐罷乃止而不復顯用也秋大
賞會典事 賜補忠翼謨修紀光國功臣號特
叙為盟府都事累轉刑曹正郎尋罷後用事者
敗公叙為成均司藝改宗簿寺正兼春坊弼善
復為正言兼司書時東方大亂 上西狩公從
世子至成川大朝論諸從官以世子輕入賊途
公亦上疏自劾癸巳以司成從 上還至永柔

亂稍定道始通乞歸見父許之至湖西冬車
駕還京拜軍器正儀出為南陽大臣白 上兵
器事重選擇才能無逾此人者請留之甲子以
大故去既卒喪復入諫院為獻納兼編修官知
制教改宗簿正兼春坊輔德後再為掌令丁酉
以司諫陞同副承旨從吳副摠惟忠出東路惟
忠南將好儒雅禮接士大夫與公心相善公拱
吳副摠東征碑已亥以刑曹叅議移左副承旨
秋特陞從二品將全給留兵圻邑事如京師還
封茂城君庚子以右尹為工曹叅判兼同知義

禁五衛副摠管仍為經理萬世德接任副使其
年有 裕陵之恤守陵三年以善於喪禮擢至
正二品連為工戶曹判書兼史局甲辰兼都察
管乙巳又兼知義禁冬特加崇政為判中樞已
酉行京畿觀察使庚戌為判義禁其年舉人任
叔英直言對策忤旨當削科公以考官上疏自
謝仍極言不可削又有大臣力持之事得解辛
亥以亂中從 上勞又加輔國為茂城府院君
後三年甲寅六月二日公卒公生於嘉靖二十
八年八月二十七日至卒之年為六十六歲訃

間為之罷朝巷市二日致吊賻如儀追爵領議
政其八月某日以禮葬于金浦縣北筮宅不利
某年月日改葬揚州金臺山下先壠之傍公自
居家孝友仁及九族至封功富貴事親無私貨
一物不告不敢私毋夫人病疽幾危殆公吮疽
得痊凡奉養服勤不以貴故使人宗族有幼孤
為之撫育而嫁娶之資其生業不問親疎性寬
厚裕如人不見喜怒好廉謹恥循已干人以自
飭見義不顧利害己丑大獄之後人人反目畏
忌戒一言得禍而公當言責論劾切爵無義殆

古之遺直方朋黨之際多抑危貴而不揚然厚
德令名以富貴終特上知許之深也及光海
政亂以元功貴臣義不可去又不去無可為慨
然獨歎日與宗族故人飲醉自遣以全晚節云
前夫人一善金氏生一男曰仁演以門子為忠
勲府都事後夫人昌寧成氏無子仁演初娶高
靈金氏再娶德水張氏皆無子以族弟佑湯之
子松胄為後丁丑江都之敗成夫人與子婦張
氏皆自決死之正月二十六日也金夫人既同
穴而葬成夫人墓在後松胄三子惟一惟中惟

新其銘曰

慈惠周愛仁也敬事不僭寅也秉直不撓忠也
令善自終恭也

鰲原君金公神道碑銘

穆衰老母黨尊屬皆不在世惟鰲原君於先妣
為內兄弟年高無恙穆以先妣之思親事之不
敢忘也今鰲原君歿幾且二十年當時侍子弟
之列者皆亡穆獨後死在世且無餘日今鰲原
君長孫弘振歷述公終始事請刻石墓道穆雖
甚昏耄安敢不勉謹叙列其事公諱守廉字志

渾姓金氏示出新羅嘗麗亡有諱綱佐我 太
祖有功封鷄林君於公為六世祖曾祖諱千齡
成宗世方君子顯用為弘文館直提學祖諱萬
鈞事 中宗為大司憲皇考諱命元相 宣祖
封慶林府院君謚忠翼妣貞敬夫人韓氏領議
政諱效元之孫也皇明萬曆二年二月丙辰公
生公有二兄皆早歿公最少忠翼公甚愛之公
能恭謹亦未嘗有子弟之過二十三以門子初
授重林道察訪後三年復除青丹道察訪四年
陞通禮院引儀兼漢城府叅軍尋為陽德縣監

其年忠翼公卒既三年為忠勳府都事俄拜高陽郡守居郡一年貞敬夫人卒後為鴻山縣監時柳希發以王后兄方貴用為女求婚公不答以故卒陰中之罷西宮閉時公私嘆曰三綱絕矣屏跡田里且十年 仁祖世召用名臣之世公為漢城府庶尹出為益山郡守後為安城不赴累除中樞府經歷司瞻寺副正宗親府典籤內瞻寺濟用監正後復為典籤不就時公已六十四歲以南漢之狩老病不得從 上嘗自言因不出絕意仕宦閑居十六年 上之二十四

年會盟新舊功臣公例陞折衝將軍僉知中樞府事七十八歿辛卯正月十三日以 恩例追爵議政府領議政鰲原君夫人成氏籍昌寧成均生負恂之女主中饋一門稱賢六十年癸巳十一月九日夫人歿享年八十二生一男一女男南重禮曹判書塔沈東龜弘文館應教南重初娶敦寧府都正閔有慶女生二女塔二人羅星斗海州牧使徐正履韓山郡守後娶宗室礪原正世憲女生三男一女男弘振戶曹佐郎一振必振太學生塔一人鄭載岳領議政太和之

子也又有庶出子女六人沈東龜生四男啟攸
輟儆攸司憲府持平輟義禁府都事公壽益尊
子孫益盛常與人謹飭益謙人亦尊事之甚敬
每節序相慶宗族畢集長幼咸序各舉觴上壽
莫不曰福祿之盛當世罕比公嘗歎息曰吾家
群從姊妹昆弟甚盛今吾後死而骨肉親愛盡
為陳跡或泣下視諸姪猶子親戚歸心銘曰
溫而安約而能毅壽考維祺以介景福

今 上八年夏日長至姨姪陽川許穆謹撰

芝山先生墓碣銘

公姓曹氏諱好益字士友其先本昌寧人江左
世族後世徙居江右之昌原曾祖司饗院正致
虞祖禮曹正郎孝淵父 贈左叅贊允慎母仁
同張氏延福君末孫之孫也明嘉靖二十四年
我 榮靖王元年十月庚戌公生八歲始就學
聰明力學長者不及十六從表叔學士周博請
受皇極經世書朱子諸書博以為太早不許時
以讀書修行已著聞矣二十三初見陶山李先
生得聞為學大方二十七八時連有父母喪既
三年 仁順王后薨祥而未禫時方籍兵都事

崔滉掌其事行至府以名勒令檢括閑丁公以居喪未禫不敢出滉怒以為慢令論以豪強之律卒有徙邊之事配西界之江東道里二千里公曰命也夷然無惡色居謫十七年常讀書凡有餽遺非其義則不受尚禮讓遠近爭師之於是立學規聚弟子行鄉飲酒之禮鄉人始知禮俗之教滉嘗侍 經筵白 上曰某以無罪得罪臣不察臣實有罪請治臣罪召用賢良諸生亦上疏伸理及國有倭寇京城不守而 上西狩柳相國成龍力言公無罪狀 上特釋之召

除官至則 上曰爾在關西關西之人信而敬之召募義兵以兵付江灘守將時江灘已不守上去平壤柳相國見公曰召募事重力為之國不亡在此公行收兵先得五百人與士卒同甘苦臨敵善謀能得人之死力往來祥原中和門伐賊功力居多柳相國聞之歎曰某以儒士不習弓馬而徒以忠義激勵士卒賢也起兵後以掌隸司評遷秋官正郎尋陞折衝上護軍明年從天兵助攻平壤賊入北關追躡清正兵至楊州 上賜賞物曰自中和伐賊克平壤又轉聞

千里斬獲甚多予甚嘉悅益加戮力後年為星
州與元帥不相能即棄官歸江東亂中仍住關
西舊謫居公已五十 上聞之遂有安州之命
一年以治理賜表裡後為成川定州皆謝病歸
賊中南方士大夫塚墓盡為寇所拔公之先葬
亦在此中在道上始聞之見星而行一如奔喪
既改葬寓居永川明年體相李公元翼初置泔
海屯田召公以屯田事專屬於公大亂之後邊
邑空虛大召流民務耕種三年邊事既完公六
十餘卜居永川之芝山從山水之樂與諸生講

學不倦為善山南原皆不出諸生稱之曰芝山
先生及我 昭敬王薨當大葬至都下從郊外
哭班既葬歸後年八月丙寅卒年六十五葬郡
南松青西向為封公敦厚好禮自居家孝悌推
至於事君教民尤致謹於祭祀事神之禮謙讓
自卑好德無窮博識多通如天文地理數家兵
法探著無所不博常讀易得數觀理通消長變
易之義自兵革來人心未定常以南方為憂公
曰不然此後憂在北方未知國事終何如耳有
所著心經質疑考誤家禮考證諸書質疑周易

釋解易象推說摠十餘卷又詩文雜著二卷南方學者上疏請加褒贈儒臣鄭經世亦白上追爵吏曹叅判永川成川皆立祠以祀之公初娶金海許氏在關西時沒而無子墳墓在江東後娶居昌慎氏有賢行後公五十九年九十五沒祔葬一壠又無子以公兄子以需為後生軫軫又無子今為後者軫從祖兄弟之子壽昌軫有外子孫其長婿李翊世無子次婿朴廷健子啓煥兄弟三人婿一人盧世益又次婿李元祐子一人未長有婿鄭重履公有孫婦鄭氏千里

乞銘今七十八歲以老死為言亦可謂婦人之賢者也其銘曰
危而不惡貴而不喜成德之美志通崇禮直而不伐好德之節

贈左承旨盧公墓表

公諱克慎字無悔別號厚齋姓盧氏本光山人光山之盧始顯於高麗至國初相嵩謚曰敬平其世益大三世祖敬長敦寧府叅奉 贈吏曹判書祖珣廣興倉守 贈議政府左贊成父鴻活人署別提 贈議政府領議政母貞敬夫人

李氏大司憲自華之女公實蘇齋盧相國守慎
之弟也相國 文定時竄珍島十九年量移魏
州之明年公四十三初筮仕前後領邑四恩津
衿川陽城金浦官止敦寧府僉正五十八持太
夫人喪因患風痺病十八年而歿公生於嘉靖
三年九月十二日歿於萬曆二十六年五月廿
六日為七十五葬化寧後有 恩例追爵承政
院左承旨兼 經筵叅贊官淑夫人德山李氏
清州牧使增榮之女七十一先公四年歿生二
男三女長男大河利川都護府使次大海榮川

郡守為伯父蘇齋相國後長女適左議政沈喜
壽次適郡守金璫次適都事金命賢子孫將數
百人公敦厚好善居家事父兄有至性善行今
其子孫之多人以為厚德之報云

司憲府監察盧公墓碣銘

公諱景命字正甫姓盧氏光州人高麗監門衛
大護軍恕致仕左右衛大護軍亶監察持平俊
卿本朝右議政嵩為四世而又三世有同知中
樞德基五世有領議政守慎後學所稱蘇齋先
生是也公為三世孫祖諱大海榮川郡守父諱

道亨醴泉郡守 贈吏曹叅判母海州崔氏左
貧成滉之女公生七歲父歿公遭喪七歲不食
肉里中至今稱之從姊兄沈公大孚學焉名行
著聞公兄弟三人伯碩命早世仲峻命既以文
學進公最少三十一母歿兄弟二人啜粥居廬
居喪之節人愈益賢之公累舉不利年已四十
不復應舉家居自守友于兄弟訓誨諸子以為
樂仲氏長於公十三年其事之之禮多人之所
不及者稱至行 仁祖十四年南漢敗後仲氏
在兩司論江都之陷罪狀主行大臣仍不容於

朝者十五六年連補外 孝宗三年復出為安
邊二年而歿於官公哀感哭泣居服舍暮年不
入私室 顯宗初年 命収用前賢之後公五
十一始仕為繕工監役再轉司憲監察其年為
奉化縣監守法廉平邑稱治有邑豪不得恣所
欲訖繡衣罷公為邑四年歸田里二年公五十
九歿公慈仁恭敬篤於行誼隣里化之里中有
薄妻者待其妻多不道自見公教家有禮慙自
悔不復以不道加諸其妻奉化時東方大飢公
發粟賑之必先孤寡尤無告者有一寒乞兒無

所歸者收而衣食之及歸擇邑中良善而屬之
邑中稱之以盧呼焉有死而貧無以葬者必具
棺以埋之公嘗立別廬於故里以資宗家祀事
令傳至遠子孫毋替也淑人慶州金氏己卯名
人文簡公淨之後而掌令聲毅之女也其居家
教家皆有禮法一門稱其賢後公十年七十二
而歿有四男思兼思敏思齊思孝思敏一寧陵
叅奉淑人窻居哭之十年年七十二疾病迨奄
奄至屬續思兼思齊刳指流血得甦後淑人
歿思敏居哀不勝喪而死 上之六年有后之

喪思兼免喪才一年除 陵寢郎不出又有二
女其二壻宗室花昌君沆國子進士韓世讓墓
銘曰
嗚呼孝且慈至行之世至行之積至行之遺

許博士碑陰記

公諱案字宗之姓許氏本陽川人大王父漸有
隱德茂行不顯於世王父曄慶尚道觀察使父
筠弘文館典翰母宗室李氏倉守遇賓之女萬
曆十一年癸未十二月二十六日公生三十四
年丙午秋榜生負四十二年乙卯謁聖及第第

四人忤時議至明年乃初授成歡道察訪及戊午獄起一門當禍公謫泗川泗川南海窮處去京師千里毋夫人年高不忍離從謫所四年茲其二年仁祖既反正大釋諸囚公遂得釋因客於星州既卒喪除成均館博士時公疾已劇謝命即歸其年復除北道兵馬評事未赴歿乙丑正月十九日卒四十三初葬於仁同巢鶴山下後三十六年庚子返葬原州蘆藪王毋金夫人墓西丑向之原公雅潔踈蕩喜笑語不幸其家敗淪謫海隅無聊日飲醉自遣大夫人歿數

年公竟客死星州人莫不悼其窮而哀其命嗟乎公雖不言知許氏必敗早得處變之方以故大禍不及焉淑人全義李氏醴泉郡守忠可之女公歿後三十年甲午四月二十四日淑人六十七歿合葬於蘆藪有二女一男其二婿連原道察訪李道章士人金耀立男徵進士

司僕主簿金公墓碣

公諱慎吉字某本光州人始祖某新羅國君之子國衰迤邐至光山隱於民伍其子孫仕高麗十世為平章鄉人號其里曰平章洞云平章之

六世有謙光事我 世祖位至左贊成於公為
五世祖高祖某 昌陵參奉曾祖某繕工監僉
正祖某父某皆早世母新平李氏漢城府參軍
某之女公三十七以門地為集慶殿參奉累轉
宗廟署奉事中興二年李适敗死賞扈從諸臣
公陞司僕寺主簿同僚有不悅者適有力於時
卒中之其後悶親老家貧欲乞官以養親其故
舊交遊多在顯位庶幾冀其推挽顧其所親不
與其所舊遂棄去流落大澤之西以沒嗚呼公
有孝友行其先府君病絕斷指流血以灌口既

孤事母有至誠撫育諸弟鄉里皆以為善行公
以萬曆十一年癸未六月十四日生以崇禎九
年丙子五月廿五日沒年五十四初葬於龍仁
縣柳谷後二十七年改葬金嶺光金累世之葬
在此妻文化柳氏僉知中樞諱希成之女有淑
哲懿行公事親孝友愛行於兄弟亦稱婦人之
賢公沒二十七年九月二十日柳氏沒七十二
合葬金嶺有二男長重榮 孝宗召用名譽耳
為教官不就次阜榮以武科為長連縣監重榮
生興鼎女三人長適士人李鎮二女幼阜榮生

二女皆幼

權安山墓表

公諱得慶字善吉姓權氏其先本永嘉人高麗
太師韋之後而我世祖功臣花川君城之五
世孫也花川君生監察曼衡監察生太學生鏞
太學生生稷山縣監大鈞縣監生監察鸞於公
為皇考縣監為後於族父禮曹正郎仁杏正郎
花川君之兄弟之孫也妣坡平尹氏掌苑諫之
女也 孝肅皇帝嘉靖四十四年二月廿三日
公生二十四選國子試我 宣祖三十二年初

筮仕為掌苑署別提二年轉軍資監直長明年
遷內贍寺主簿尋改刑曹佐郎其年為平壤府
判官以治理特聞 上賜表裡以賞之五年不
樂歸後年為交河後二年為工曹佐郎尋陞正
郎連為德川金山有遺愛德川郡有治績碑
仁祖三年為安山後三年有虜變 上出幸江
都既與虜約成輸貨幣人皆以計避之公受
命即行亦無難色為郡六年而歸公時六十六
歲老於衿陽別墅閑暇自娛丁丑三月八日淑
人李氏歿其七月十六日公歿公與淑人同年

生皆七十三合葬于砥平縣治南西向原公儀
狀俊邁出衆人善草隸公居家夫婦敬相待如
賓子弟侍立戶外不命之入不敢入吾聞敬德
之聚能敬必有德公不大用於世以其教於家
者知其子孫必興淑人我太宗別子孝寧大
君補之後掌苑應生之女也生一男二女男曷
女長適僉知中樞唐原君洪有燬次適晉州判
官尹左辟曷三男尚規尚矩尚準尚規義禁府
都事尚矩安邊都護府使尚準長寢齋郎壻四
人士人金啓聲折衝將軍尹昌亨士人趙澹佐

郎申圭內外子孫甚衆其銘曰

式式其敬皤皤者造官不稱德宜其有子孫之
報

權副正墓表

公諱統字

姓權氏高麗太師幸之後而我

太祖名臣文忠公近之八世孫也曾大父軾察

訪 贈左贊成大父悰郡守 贈吏曹判書父

覲參奉 贈左贊成以長男縉貴故有三世封

爵母貞敬夫人李氏義禁府都事希參之女公
少有仁孝性事父母必以父母心為心當兵革

之世奔竄道路公未成童能服勤奉養有動人者見者多數息賢之轉客湖右闔家癘疫公強起供給不絕母夫人泣持曰兒以病能供子職耶時先府君歿顏色哭泣有不忍見者萬曆末初筮仕為繕工監役累轉司憲監察漢城判官掌隸司議皆以持法多之尋改軍器僉正為大臣所拔擢陞副正將遷至大官時遷官者非私運不得公以簡潔不果遷 仁祖元年為旌善郡守不幸遭家難即謝歸絕意仕宦常痛恨伯氏判書公抑危於世卒為孽臣所賊害足跡不

出門三十年大夫人八十八歿公亦六十二啜粥守塚哭三年七十六歿 孝宗五年十一月廿三日葬抱川族葬以靖社原從追爵承政院左承旨夫人廣陵安氏安東府判官溱之女也夫人有婦德賢行事姑夫人克順庭無間言四十年公歿夫人已八十猶躬執饋奠三年不懈謹飭有禮祭祀必潔誠教家必貴義而賤貨視子孫仁愛必均睦宗族踈遠不遺長男伯連為縣邑夫人戒之曰臨民必推恕毋令老母慚愧於受養內外不嚴者苞苴之運尤不可不慎公

歿後十二年六月二十四日夫人歿壽九十卜
葬於抱川族山未向之原乃合葬焉銘曰
嗚呼德善之厚是訓是承宜其有壽福之報可
以勸可以興

權處士碣銘

公諱宗吉字伯休姓權氏其先本福州人福州
之權皆祖太師辛為大姓高祖希孟曾祖應挺
皆貴至觀察使祖守沙斤驛察訪父慶男嘉山
郡守母李氏籍咸平贅成瓘之女也公以名家
之世世甚敦厚悅人之善恥人之不善其居家

教子孫與人交皆然與我同里閑長於我十二
年我兄事之當光海之末見政亂入橫川之蒼
峯不復應舉求名耕稼以自給六十九歿葬縣
北十五里懷真之洞孺人鄭氏致仕左贅成宗
榮之孫揚州牧使燭之女孺人少於公二年公
歿後九年七十六歿附葬同原生五男四女男
穆穆桂穉穆生負穆以才能聞官止戶曹正
郎婿尹鎔朴成胤金聲李弘弼弘弼以武科得
仕以營將出湖南穆生聖行聖中婿李天培柳
冕金夏貞桂生聖時婿趙章胤任宇禎穆生聖

與聖輔壻李斗齡又未長者二男三女穆穠無子穆以聖中為後穠以聖輔為後尹鏞生漢濬濬慶冑濟濬黃澗縣監壻申拭朴成胤生之相之彬之相進士壻韓世臣李昌美沈周翼李汝楫南宮至世臣 靖陵叅奉金聲生命賁命錫命擇壻安汝泰朴慶來慶來進士李弘弼生元佐舜佐尹衡商又一女未嫁銘曰厚畜於其身以永其後人

權正郎墓誌

君諱穆字泰如姓權氏其先福州人曾大父守

沙斤道察訪大父慶男嘉山那守父宗吉通德郎毋八溪鄭氏揚州牧使 贈左贊成燾之女郡守之弟平壤府判官裕男生成均生負克吉嗣絕以君為後 皇明萬曆四十二年甲寅君生崇禎十二年選國子進士我 仁祖末始筮仕為水庫別檢其年有 大喪賞因山之役以監役陞為活人署別提明年庚寅轉刑曹佐郎俄改戶曹佐郎辛卯通德郎歿既除喪復為戶曹佐郎一年為咸興府判官有官糴積逋累千斛君務積儲逋租充滿悉燒其券又長於剖決

百姓歸心戊戌君以疾歸其父老刻名鑄銅曰
無以報侯之德其年所後母金氏歿庚子復為
戶曹尋陞正郎元前後三入戶曹及為秦仁本
曹以為經費之司財賦所出非此人不可 啓
上特留之其十一月本生母鄭氏歿明年癸卯
正月君歿年五十嗟乎十年之間哭泣居憂者
七年月日禮五十不致毀有疾者飲酒食肉以
毀而死為戒然既創鉅痛深卒至於不勝喪而
死者使人大感嗟乎命也其四月葬于揚州之
道峯山下權氏族葬君又無嗣其為後者兄穆

之子聖中也嗟呼君與我同里子君雖少於我
十九年知君莫如我君自少時沈厚有氣力恥
與流俗人自比長而益力愛人好士善談論交
結一時名勝及仕於朝致名譽莫不曰賢出為
郡邑又遺愛在民如成父老聞君之亡食不肉
如悲親戚誠非得人之深者其能此乎君確而
肫平生重意氣輕財好施慕義強仁與人大淳
七十三歲老人孔巖許穆著

崔別提碣銘

公諱基鏘字子勤姓崔氏本江陵人高麗世有

三重大匡必達是為始祖中世有宗正卿漢柱
宗正卿四世有集賢殿提學致雲五世有大司
憲應賢江陵皆有鄉賢之祠大司憲於公為四
世祖三世祖戶曹叅判世節大父文昭殿叅奉
壽獻考宣教郎景祥為伯父寧越郡守壽增後
有才譽早歿妣草溪鄭氏右賢成八溪君宗榮
之女亦早歿 顯皇帝萬曆元年癸酉七月十
一日公生公既早失父母育於外家外祖八溪
君家敦厚有禮公又力學礪行行已有方操守
堅嚴一時士多畏憚之者光海四年選博士弟

子與其弟基鉅同在泮宮其明年有永昌獄起
太學齋生河仁浚者承鄭造等遷大妃之論
驅大學諸生上疏言廢大妃事公慨然曰人
之道滅矣兄弟二人遂去太學皆被禁錮自是
廢舉子業屏迹丘園 仁祖丁卯除尾署別提
不就居家有法以教子弟弟基鉅後登第不樂
仕宦累官止國子司藝公潔身五十年以壽終
仁祖二十三年乙酉九月九日年七十三初葬
於原州之古毛谷宅地不利再遷而卜鋤谷東
麓吉乃葬夫人元氏高麗國子進士耘谷先生

天錫之七世孫而副司直應霖之女也慈惠仁
恕雖婢僕下賤亦未嘗斥言其過恒言以為善
教子孫恩信周盡親戚歸心夫人生於隆慶庚
午三月十六日歿於 仁祖二十六年戊子十
二月十四日壽七十九合葬於鋤谷申向原生
四男三女男文澳文活文濩文湜文澳靈巖郡
守文活咸陽郡守文湜今為黃海道觀察使皆
以科第進文濩生負壻三人金克重洪泰承朴
昌胤皆士人文澳壻三人許炯閔之鎬沈禱之
鎬進士文活生東望東老東益東老生負今為

司饗叅奉為文澳後壻三人權灝宋廷軾沈櫛
又庶出男東楠文濩生東相壻三人尚來周朴
灝任斗登灝進士又有庶出男東樑東楹女二
人一人嫁李庭植一人幼文湜生東準進士壻
八人金大成李秀漢權堦曹夏亨李藩李養源
李一台宗室林原君杓堦持平夏亨進士金克
重生瞎眡壻三人閔堦李恪元震亮洪泰承生
瑞疇壻六人朴自懋朴文桓李命夏權好經李
再李瑞益命夏進士朴昌胤生之楨壻四人李
文胄權斗元成壽昌李之亮内外子孫三世四

世百餘人銘曰
離泲忍以潔其身守窮約以裕其後人

李典籤墓碣銘

公諱守約字而省姓李氏 太宗賢王孫秀泉
君貞息之五世孫也王父諱元翼相 宣祖有
功德謚文忠父諱義傳以治郡高第累陞後襲
封完善君母貞夫人順興安氏通仕郎諱宏之
女也公少讀書專於應主司之文蹭蹬不得意
選止國子生負官不過倉守命也事父母有至
性能承意順適唯恐一事不得盡於歡心性儉

率無華簡交遊非良善不許好硬直平生以辱
已媚人為恥鄭公經世李公峻見而悅之退而
語人曰善乎相國之教在子孫如此次其履歷
仁祖二年生負初仕在元年繕工監役掌苑署
再為別提掌樂院主簿掌隸院司評刑曹佐郎
工曹佐郎正郎掌樂院司宰監僉正宗親府典
籤又三為殿中再為倉守典籤時侍輪對 上
問職事公對之甚悉 上從容問治郡縣幾對
曰臣為郡縣五 上心善之在列者私相語曰
斯人者習於事者也奏事可觀明年由倉守出

為高城為郡縣六延豐抱川陽川龍潭淳昌高
城延豐龍潭寂有聲績延豐有遺愛碑公從仕
四十年好廉簡常以怠官曠職為戒曰世受國
恩思以服勤報 上云臨歿淨掃室堂嬾人毋
得在側遂絕君子以為正終公 宣祖二十三
年庚寅三月十八日生 上之九年戊申二月
十六日歿年七十九其四月廿八日葬于衿陽
秀泉君墓後李氏衿陽之葬六世公前娶白氏
生四女其壻李后勉成楚老權以經韓相五相
五進士後娶徐氏監察弼華之女生四男曾賢

師賢象賢景賢曾賢縣監又女一人其壻沈之

詠銘曰

賢善不夸忠也直理無華慈也忠而慈良善之
翼翼

鎮川宋氏墓表

士人李象賢妻宋氏籍鎮川縣監興詩女而司
諫崔尚重之外孫也十九歸李氏淑潔有古賢
婦人之行為家嚴而主息事舅姑必承意順適
宗族隣里仁厚大信莫不曰賢其舅吾妻兄李
典籤守約也其長子無嗣屬其所後兒曰擇兒

必先擇母其賢行信於家亦如此宋氏崇禎七年七月丁亥生 上之九年十二月庚寅歿年三十五葬雲陰李氏族葬生二男一女大兒前四年歿其一男一女皆幼穉兒既葬其夫以書乞銘曰賢前年葬親於雲陰因居塚廬有僮僕傳室婦小簡書曰得死夢不出今年當死仍為訣語其十二月果死妻死而其言其行事可以與人言少言語未嘗遽喜遽怒好儉約貧而不苟不留細故不失於親戚有二姊早歿常涕泣撫其兒賢偏急不能容人勉之曰容能忍忍能

強恕則無愠強則不動橫逆之來自返而不善改而無愠自返而善守而不動橫逆妄耳我何與較賢心受其言今其死矣死而不沒其善為化者相報之義此也不亦善乎一言而善百行可信况其行又有動人者乎不可以不識也銘曰
嗚呼家人女正歿而無命

李典籤墓誌

公姓李氏諱守約字而省我 太宗賢王孫秀泉君諱貞息之五世孫 宣祖中興相文忠公

諱元翼之孫完善君諱義傳之長男也母貞夫人順興安氏通仕郎諱宏之女也萬曆十八年三月十八日公生文忠公甚愛之十年始學書博讀經史十七選國子初試雖不利皆曰能光海時文忠公諫而得罪公時二十六因廢舉將十年仁祖既反正文忠公復入為相公初筮仕為繕工監役明年為掌苑署別提其年選國子試二等第九人生負後累轉司憲府監察掌樂院主簿掌諫院司評戊辰為延豐縣監延豐本廢縣當復邑初置官公蓋選擇遣之也果以

治理名既歸其人至刻石追思不已癸酉復為監察一年遷工曹佐郎乙亥陞正郎丙子為陽川縣令冬有虜變急上幸南漢完善君從上於圍城之中上既下城完善君適嶺南公即解官從之己卯有宰相白上拜刑曹佐郎俄出為龍潭縣令乙酉為抱川縣監以疾即歸丁亥完善君卒甲子李适叛時功臣等大懼以內變動上意盡殺故相竒自獻寺三十七人實謀不及三公矣金相國謚狀曰當誅殺三公亦預其事公居完善君憂從草土上疏卞之

上即下太常釐正之 孝宗元年為淳昌郡守
一年忤上司罷明年配享文忠公 仁祖廟庭
特除公掌苑別提秋陞宗親府典籤嘗侍輪對
具奏當府弊事 上悉令變更之仍從容問治
郡縣幾對曰臣嘗為郡縣五 上心善之既罷
在列者皆曰斯人者習於事者也葵事可觀癸
已移廣興倉守尋出為高城郡守一年又不悅
於上司罷公自此益無意仕宦治園林以自遣
凡五年戊戌為司宰監僉正公雖不樂當官必
盡職不敢怠常曰世受 國恩庶官雖微思以

服勤報上云 上之元年改掌樂院僉正後年
復移倉守一年以老適時公已七十三數年因
沉綿病戊申二月十六日歿公疾革命淨掃室
堂令諸子不離側婦人毋得近前徐淑人請永
訣公不應恬然而逝善乎此君子所謂正終者
也年七十九其四月二十九日以禮葬于秀泉
君墓後從治命也公事親有至性好儉素不喜
外飾慕善如嗜欲見不善若晚已臨事不苟平
生以辱已媚人為恥李公坡稱之曰某有先相
國之風鄭公經世亦曰可謂賢相國之孫也樂

觀書有記述開中雜錄十卷公再娶而生四男
五女前娶白氏籍隋城公少年得沉綿病幾危
死者十年白氏日夜祈天禱命積至誠救之疾
得痊一門稱賢三十六歿生四女其壻李后勉
成楚老權以經韓相五相五進士後娶扶餘徐
氏監察弼華之女也生四男一女男曾賢師賢
象賢景賢曾賢縣監壻沈之詠銘曰
質而無華儉而不奢不媚世而苟容不辱己而
為恭可以言可以勸可以聞

贈叅判金公墓銘

公本江左閩韶人姓金氏高麗時太子詹事龍
庇新羅敬順王之苗裔而於公為十二世明嘉
靖三十六年十一月四日公生於安東府一直
縣龜尾里公諱誦字道源曾祖 贈承政院左
承旨禮范祖成均生貞 贈吏曹判書璉父自
如道察訪守一母漢陽趙氏司果孝芬之女也
公少讀書修行以才學著名二十七父歿三十
四登科目補承文權知正字尋遷藝文檢閱冬
在直發痘甚重無生氣 上令中官踵問之且
謂曰雖病厚賦者不歿疾果瘳歸家未返有倭

寇急 上西幸是 昭敬王二十五年而公三
十六賊連隔三京道不通公募鄉兵會諸義兵
拒守至明年秋始得達 行在所復入翰苑稱
良史時 帝已發遼左兵來救連勝之至高陽
以輕騎遇賊大敗提督遁免遂與連和令軍中
禁勿交兵冬 上還京公以奉教陞成均典籍
移騎省佐郎未幾以正言兼春坊司書陞獻納
改副修撰兼 經筵檢討官尋以持平為吏曹
佐郎陞正郎於是重於時趙學士正立語人曰
自吾筮仕來秉心清直惟見鄭景任金道源兩

人云未久以司諫移司成為執義兼春坊輔從
時 昭敬王三十一年而公四十二賊留屯海
上聲音再舉而 帝又發南北官兵十餘萬征
倭左相李公元翼為諸道都體察使公為從事
每與計事稱強佐方大兵至而兵食甚急公以
校理出為督運御史時柳公成龍以上相受命
危亂之際以死自任而 上亦倚任之甚重小
人乘瑕隙日夜沮毀百計令憾怒 上心柳公
去位而在朝良善一一斥去公亦被斥不容於
朝或置散或補外為善山醴泉尚州洪州方師

旅之際中外板蕩治道大壞公所至一以保民
興學善俗為務亦不得久於官久不過一年二
年居洪州一年太夫人年高以親老謝歸其明
年太夫人歿公已五十四居喪之節不以衰老
少變既除喪為太常正以編修官叅修 昭敬
王寶錄當羣小秉政是非大乖公正色一一正
之領相竒自獻歎息曰明知 先王時事無善
於此人者富平有疑獄久不決有本道啓 聞
朝廷特擇人遣之公受 命往聽兩造閱實情
偽立辨人心大悅莫不曰有人有人云以太常

正例陞通政居西班 年為驪州公已六十方
世道大亂公益無意世事銜罷遊驪上蕭散而
已公有長子死而辭以歸葬因去歸乘舟上北
江行李蕭然州父老吏士送之江上相與嗟歎
政潔良久乃散歸公歸田里四年而歿庚申十
月十九日年六十四公平生寡言笑儀狀秀雅
口不言人臧否朝政得失樂觀書不以事物經
心親親善善可見行已處心之正戒子弟常言
說讀聖賢無實踐空言無益吾少年志學中間
枉過半生年老雖欲悔過亦莫追吾平生服膺

窮不失義達不離道八言亦勉之性澹然無他
嗜好以山水自娛自號雲川當亂世與俗易良
韜晦以終臨歿屏婦人曰禮男子不絕於婦人
之手不言家事恬然而化可謂君子之善終後
年正月甲申葬臨河申谷淑夫人李氏軍器寺
僉正寓之女而陶山李文純公之孫也夫人素
稱婦德事舅姑有禮一門稱其賢又仁於媵妾
篤於宗族皆曰大賢之世家教有自夫人與公
同年生公歿夫人哀感哭泣三年而六十七歿
十月九日也葬林塘有五男是柱是捷是楨是

棧是相是柱 西國子壯元登大科為騎曹負
外是楨亦同榜生負不幸短命先公死者四人
是柱四十三公驪州時死而歸葬者是捷二
十一是楨三十四是相二十八是棧公歿時四
十四不勝喪亦未練而死公歿之後二十年己
卯長孫熙改卜宅兆合葬於臨河枝洞又後十
三年辛卯 孝廟初政以壬辰募鄉兵拒守事
有白 上者公特追爵吏曹參判夫人為貞夫
人今來問銘者金負外之孫方為 孝陵齋郎
金泰基也其墓銘曰

言別集卷之十七
三十一
嗚呼君子之邦君子之教君子之人魯無君子
斯焉取斯信有若人

記言別集卷之十七終

